

歷代名醫蒙求

歷代名

哲人序本草嘗

醫者意也蓋謂醫爲人之
司命必較其意能精微緼
奧而極乎非常之妙則天
下之疾豈不可治者矣況

醫之道有神聖工巧之殊
藥之性有君臣佐使之別
人之受病則寒熱燥濕強
弱盛衰千變萬態不可
言既苟非精其意而通
其妙烏能已人之疾以醫

自名而流芳於千載也
耶天憫黎庶挺生名
醫代不乏人蓋項背相
望也然孰能編類彙屬
載之方冊而便於人之
見聞耶案菴周君清

雅好事退公多暇博覽
今予每愛重之一日傾蓋
款語出示一書鬼羅甚
富上自三皇迄于

鉅宋其間名醫用藥愈
疾起死凡得二百有奇為

一百聯姓氏枚舉下韻諺
珠連目之曰歷代名醫家
求予三復讀之喜其用心
之善而有益於人也使醫
家者流見是書也莫不
盡心竭慮思無愧於古

人而初學之士能熟讀
是書徐味其旨慕想
其人而深求其意發
乎袞聖工巧之域豈
小補之哉嘉定庚辰四
月既望錢塘蘇霖序

歷代名醫蒙求總目

案菴周

守忠撰集

卷之上

神農百草

虛犧九針

郭玉診手

文摯見心

王遂煉石

安期置金

禹見猶淺

信識未深

淳于事楊

長桑授鵠

鉤醫腫背

仰愈軟脚

史脫治疔

趙泉療瘡

陳不讀書

范曾賣藥

鳳綱不老

能嗣延年

方慶百中

涓宗十全

嗣明十万

道恭三千

承祖時稱

徐敏代傳

顯識孕男

徽診懷女

延禧炎螯

醫和辨蠱

張苗烝桃

伯宗移樹

僧垣通洽

裴頤稽古

佛來醫范

神至愈張

鵠識骨髓

緩知膏肓

梁新薑汁

趙鄂梨漿

彥伯列竈

玄亮修堂

陳寨換心

万福見頂

褚該盡術

德濟好命

吳善醫方

張達藥性

謚受母言

殷醫父病

太丞半夏

翰林橘皮

任度蛇液

蔡謨蟛蜞

董奉起死

梁革活屍

明生神救

洵子鬼遺

從善銚源

賈祐纂要

歡置孝經

張讀本草

巫彭初醫

李密盡妙

羊欣精能

嗣伯多効

呂博玉匱

孟詵金盤

雷公炮炙

文子散丸

抱一仙豆

黃帝神丹

壺公貨市

子信隱山

道士醫工

書生療僣

張華優博

祖珽詳練

李譔該覽

樓護精辯

程高不倦

法存無厭

巫咸鴻術

帛公素書

桐君藥對

甄權經圖

韓康長安

萬祐成都

村嫗禁毒

異人治疽

高俞論脉

矯盧議疾

守真治瘡

陳遂愈癰

思邈千金

靳邵五石

立言出蛇

法靖辨蛭

卷之下

王纂驅獺

師皇醫龍

君異栽杏

阮丘種葱

安常鍼兒

幾道謁翁

鉸匠鈐蛇

術士挑蟲

謔雄父子

度嚮兄弟

樊阿青麩

負局白水

徐鈞塗心

俞附浣胃

宮制三物

許用一味

建肯不仕

璟知非娠

張銳兩治

趙巒六神

孫使醋泥

僧用塏塵

歧伯嘗味

小郝吐津

周廣觀色

鳴鶴刺血

涪翁針經

叔和脉訣

華佗湔腸

李豹尉脇

山叟辨蛟

王隱議鱉

卿詐魚膾

趙供鰻羹

宋邑率性

程據徇情

劉德精妙

之才神明

李脩奔宋

胡軻歸京

衛沉小才

杜度上手

醫博燒裊

光遜吸酒

白岑囊中

葛洪肘後

秋夫針鬼

李祐救婦

季舒不怠

何顥無虛

徐療沉滯

綽治偏枯

循陳高允

李愈仲舒

子雲施人

鄧訓縛胡

李醫何功

飲子有福

范汪燃薪

玄景挂木

熙獲鏡經

俠撰心錄

葛治五絕

李用八毒

楊慶妙論

仲景良醫

居達救死

杜信扶危

玄俗治殃

倉公決疑

遠遊詔用

弘景表辭

高期頗通

褚澄先審

郝老明方

與權識證

元忠倜儻

秦信明敏

唐安溫雅

阮侃沉靜

周澹賜妾

姜撫通僊

郝允苦瓢

王通雪玄

智藏誠孝

法程報愆

洽撰三卷

劉著十篇

靖公治意

宣文觸諱

張敦夢神

公景走鬼

杜公弗効

用成罔昧

元欽蛇肉

太醫獺髓

深師療脚

鬻龍治眸

醢妬扁死

趙言沈羞

銀匠下責

都料取鈎

商人罌底

草澤筆頭

纂集名醫

博攷今古

倘或闕遺

冀其綴補

歷代名醫蒙求卷之上

案菴周

守忠撰集

神農百草 處犧九針

史記炎帝神農氏人身牛首長於姜水因
以爲姓火德王故曰炎帝始教耕故號神
農氏始嘗百草始有醫藥

帝王世紀處犧氏以六氣六府五藏五行
陰陽四時水火升降得以有象百病之理
得以有類乃嘗味百藥而制九針以拯天

枉矣

郭玉診手 文摯見心

范曄後漢書郭玉者廣漢雒人也和帝時
爲太醫丞多有效應帝竒之仍試令嬖臣
美手腕者與女手雜處帷中使玉各診一
手問所疾苦玉曰左陰右陽脉有男女狀
若異人臣疑其故帝歎息稱善

列子龍叔謂文摯曰子之術微矣吾有疾
子能已之乎文摯乃命龍叔背明而立文

摯曰自後向明而望之旣而曰嘻吾見子之心矣方寸之地虛矣幾聖人也子心六孔流通一孔不達今以聖智爲疾者或由此乎文摯者春秋時宋國之良醫也

王遂煉石 安期置金

史記王遂少習經方爲齊王侍醫然性孱弱常多微疾遂自煉五石服之淳于意診之告曰中熱不洩者可服石石之藥精悍公服之不得洩亟勿服當發癰疽遂曰扁

鵲云陰石以治陰病陽石以治陽病夫藥石者有陰陽水火之劑故中熱即爲陰石柔劑中寒即爲陽石剛劑治之意曰公所論遠矣扁鵲雖言若是然必當審診處意告之後百餘日果疽發死

列仙傳安期先生賣藥海邊時人皆謂之千歲翁李少君太山採藥病困殆死安期與神捷散服一錢遂愈秦始皇聞之召見與語三日三夜賜金璧數千出於阜鄉

亭皆置之而去留書及赤鳥一童爲報後
千歲求余於蓬萊山下始皇遣使者徐氏盧
氏等數百人入海至蓬萊山下遇風波而
還立祠於阜鄉焉

禹見猶淺 信識未深

史記王禹素以術藝爲濟北王太醫王以
禹識見猶淺今就太倉公意學醫經脉俞
穴所在悉通之以此名知漢代焉

史記馮信臨淄人爲齊太倉長性好醫方

精於診處而淄川王猶以其爲識見未深
更令就淳于學方意教以按法逆順論藥
法定五味及和劑湯法信受之擅名漢世
淳于事楊長桑授鵲

史記淳于意師公孫光悉授其書意欲盡
求他精方光曰吾方盡矣吾身已衰無所
事之是吾少年所受妙方也公母以教人
意曰悉得禁方幸甚死不妄傳人光喜曰
公後必爲國工臨淄楊慶有奇方吾不如

也汝可謹事必得之意遂捨光而事慶焉
史記扁鵲傳長桑君過扁鵲獨竒之常謹
遇之長桑君亦知扁鵲非常人也出入十
數年乃呼扁鵲私坐間與語曰我有禁方
年老欲傳與公公毋泄扁鵲曰敬諾乃出
其懷中藥予扁鵲飲是以上池之水三十
日當知物矣乃悉取其禁方書盡與扁鵲
忽然不見殆非人也扁鵲以其言飲藥三
十日視見垣一方人

方猶邊也言能隔牆見彼邊之人則脈通

也神以此視病盡見五藏癥結特以診脉爲
名耳

鉤醫腫背 仰愈軟脚

尸子有醫鉤者秦之良醫也莫知其姓
張子之背腫命鉤治之謂醫鉤曰背非吾
背也任子制焉治之遂愈鉤誠善治疾也
張子委制焉夫身與國亦猶此必有所委
制然後治

千金序仰道人嶺表僧也雖以聰慧入道

長以醫術關懷因晉朝南移衣纓士族
不襲水土皆患軟脚之疾洙者無不斃
踣而此僧獨能療之天下知名焉

史脫治疸趙泉療瘡

晉書史脫性器沉毅志行敦簡善診
候明消息多辨論以醫術精博拜太醫校
尉治黃疸病最爲高手

晉書趙泉性好醫方拯救無倦善療衆
疾於瘡尤工甚爲當時所歎伏焉

陳不讀書 范曾賣藥

名醫錄陳昭遇歸明治疾無不効者後薦
入翰林院充醫官世呼神醫絕不讀書請
其所習不能應答嘗語所親曰我初來都
下揮軍壘中日試醫數百人其風勞氣冷
皆默識之凡醫古方用湯劑無有不愈者
實未嘗尋脉訣也故今之醫者皆言口傳
心記歷多達妙反非好醫學者雖明方書
不會醫病豈勝我哉夫窮習方書而治

病未愈者歷少而未達應驗但不誤命何足恠哉其不習方書而善治者因醫失多而得悟其要也故兵法曰不知用兵之害不得用兵之利者譬如斯也

列仙傳范蠡字少伯徐州人也事周師太公好服桂飲水爲越大夫勾踐破吳後乘輕舟入海變姓名又適齊爲鴟夷子皮後百餘年見於陶居累億萬號陶朱公復弃之蘭陵賣藥後人世世見識之

鳳網不老 能嗣延年

神仙傳鳳網者漁陽人也常採百草花以水漬封泥之自正月始盡九月末止埋之百日煎丸之卒死者以藥內口中皆立活網長服此藥至數百歲不老後入地肺山中仙去

何首烏傳昔何首烏者順州南河縣人祖名能嗣父名延秀能嗣常慕道術隨師在山因醉夜臥山野忽見藤二株相去三

尺餘苗蔓相交久而方解解了又交驚訝其異至旦遂掘其根歸問諸人無識者後有山老忽來示之答曰子旣無嗣其藤乃異此恐神仙之藥何不服之遂杵爲末空心酒服一錢服數月似強健因此常服又加二錢服之舊疾皆痊髮烏容少數年之內即有子名延秀秀生首烏首烏之名因此而得生數子年百餘歲髮黑何首烏長筋肉益精髓壯氣駐顏黑髮延年

方慶百中 脩宗十全

唐書王方慶太原人也雅有材度博學多聞篤好經方精於藥性則天令監領尚藥奉御張文仲侍醫李虔縱光祿韋藏等撰諸藥方方慶撰隨身左右百發百中備急方十卷大行於世

唐書許脩宗常州宜興人初仕陳新蔡王外岳參軍時柳太后感風不能言名醫療皆不愈脉益沉而禁脩宗曰口不

可下藥宜以湯氣薰之令藥入腠理周時
可差乃造黃芪防風湯數十斛置於牀下
氣如煙霧其夜便得語武德初關中多骨
蒸病得之必死迺相連染侑宗每療無不
十全

嗣明十萬 道恭三千

北齊書馬嗣明少博綜經方爲人診脉一
年前知其死生邢邵唯一子大寶年十七八
苦傷寒嗣明爲診其脉退告楊愔云邢公

子傷寒不療自羸然脉候不出一年便死
大寶未暮而卒其驗如此者甚多惜薦爲
典丞皇建中稍加給事至通直郎散騎常
侍嗣明針灸孔穴往往與明堂不同武平
末從駕往晉陽至遼陽山中見文勝云女
病能瘥者與錢十萬衆醫視之無敢措手
嗣明見勝笑曰真得汝矣乃抵其家問其
由云曾將麥種見赤物二尺似蛇入指中
因驚倒手臂疼重月餘日漸及半身腫痛

不可忍呻吟晝夜不絕嗣明曰毒蛇爲鶴
所啄血遺於此犯而得之即受方令服十
餘劑湯以散補之明年還鄴女病都愈載
鏹而歸

名醫錄周顯德中京都有醫士沈道恭幼
習儒業自量分薄留心醫術時會史令公
族有患者國醫名手俱不効有人薦言沈
道恭請醫之道恭畏令公威勢又聞先約
賜錢三千緡兼有奏恩道恭面詣薦者訴

曰醫不憚固命薄恐爲厚賂之所障未審
更欲募何人治之薦者曰惟周德濟也道
恭曰聞周德濟素無醫業惟德濟得好命
耳幸同召之道恭與診處推究病因特令
德濟用藥後果如效蓋非在學亦由命之
所然也

承祖時稱 徐敏代傳

宋書秦承祖性耿介專好藝術於方藥
不問貴賤皆治療之多所全護當時稱之

爲上手撰方二十卷大行於世

齊書徐敏齊太常卿之範子代傳攻醫博覽多藝隋開皇中爲駕部郎中

顯識孕男 徽診懷女

魏書王顯字世榮雖以醫術自通而明敏有決斷才用初文昭太后之懷世宗也夢爲日所逐化爲龍而遶后后寤而驚怖遂成心病文明太后勅召諸醫及顯爲后診脉徐謩云是微風入藏宜進湯加針灸顯

言按三部脉非有心疾將是懷孕生男之象果如顯言

宋書宋少主元徽出樂遊苑門逢一婦人有娠元徽善診脉爲診之曰此腹是女也問徐文伯文伯曰腹有兩子一男一女男在左邊青黑色形小於女元徽性急便欲使剖文伯惻然曰若加斤斧恐其變異請針之立落瀉足太陽補手陽明胎便應針而落兩兒相續出果如文伯之言

延禧灸螫 醫和辨蠱

太平廣記趙延禧云遭惡蛇虺所螫處帖之艾炷當上灸之立瘥不然即死凡蛇齧即當齧處灸之引去毒氣即止

左傳晉侯求醫於秦秦伯使醫和視之曰疾不可爲也是謂近女室疾如蠱非鬼非食惑以喪志良臣將死天命不祐公曰女不可近也對曰節之趙孟曰何謂蠱對曰淫溺惑亂之所生也於文皿蟲爲蠱穀之

之飛亦爲蠱在周易女惑男風落山謂之
蠱皆同物也趙孟曰良醫也厚其禮而
歸之

張苗烝桃 伯宗移樹

晉書張苗雅好醫術善消息診處陳廩丘
得病連服藥發汗汗不出衆醫皆云發汗
不出者死自思可烝之如中風法令溫氣
於外迎之必得汗也復以問苗云曾有人
疲極汗出臥簟中冷得病苦增寒諸醫與

散四日凡八過發汗汗不出苗乃燒地布
桃葉於上烝之即得大汗便於被下傳粉
身極燥乃起即愈廩丘如其言果差
名醫錄薛伯宗善以禁法治療時公孫泰
患發背伯宗與移於樹上

僧垣通洽 裴頠稽古

北史姚僧垣字法衛吳興武康人也父菩
提梁高平令嘗嬰疾歷年乃留心醫藥梁
武帝召與討論方術言多會意由是頗禮

之僧垣幼通洽居喪盡禮年二十四即傳家業醫術高妙爲當時所推前後效驗不可勝紀聲譽旣盛遠聞邊服至於諸蕃外域咸請託之垣乃參校徵效者爲集驗方十二卷又撰行記三卷行於世

晉書裴頠河間聞喜人性弘雅有遠識博學稽古洞明醫術每有疾瘵不限貴賤皆見拯療自少知名通博多聞時人謂言談之林藪

佛來醫范神至愈張

齊諧記有范光祿者得病腹脚並腫不能
飲食忽有一人不自通名徑入齋中坐於
光祿之側謂曰先不識君那得見詣荅曰
佛使我來理君病也光祿遂發衣示之因
以刀針腫上倏忽間頓針兩脚及膀胱百
餘下出黃膿水三升許而去至明並無針
傷而范漸愈

稽神錄江南刑部郎中張易少居菑川病

熱疾困憊且甚恍惚見一神人長可數寸
立於枕前持藥三丸曰吞此可愈易受而
亟吞之二丸嚙之一丸落席有聲因自起
求之不得家人驚問何爲具述所見病因
即愈爾日出入里巷了無所苦

鵲識骨髓

緩知膏肓

史記扁鵲渤海郡鄭人也姓秦氏名越人
少時爲人舍長舍客長桑君過扁鵲獨
奇之常謹遇之長桑君乃悉取其禁方書

盡與扁鵲扁鵲過齊齊桓侯客之入朝
見曰君有疾在腠理不治將深桓侯曰寡
人無疾扁鵲出桓侯謂左右曰醫之好利
也欲以不疾者爲功後五日扁鵲復見曰
君有疾在血脈不治恐深桓侯曰寡人無
疾扁鵲出桓侯不悅後五日扁鵲復見望
見桓侯而退走桓侯使人問其故扁鵲曰
疾之居腠理也湯熨之所及也在血脈鍼
石之所及也其在腸胃酒醪之所及也其

在骨髓雖司命無奈之何今在骨髓臣是以無請也後五日桓侯體病使人召扁鵲扁鵲已逃去桓侯遂死

左傳成公十年晉侯夢大厲被髮及地搏膺而踊曰殺余孫不義余得請於帝矣公覺召桑田巫巫言如夢曰不食新矣求醫於秦秦伯使醫緩爲之未至公夢疾爲二豎子曰彼良醫也懼傷我焉逃之其一曰居肩之上膏之下若我何醫至曰疾不

可爲也在育之上膏之下攻之不可達之
不及藥不至焉不可爲也公曰良醫也厚
爲之禮而歸之

梁新薑汁 趙鄂梨漿

北夢瑣言唐崔鉉鎮渚宮有富商舶居
中夜暴亡迨曉氣猶未絕隣房有武陵醫
工梁新聞之乃與診視曰此乃食毒也尋常
嗜食何物僕夫曰好食竹雞每年不下數百
隻近買竹雞併將充饌梁新曰竹雞喫半

夏必是半夏毒也命擣薑揅汁折齒而灌
由是方蘇崔聞而異之資以僕馬錢帛入
京致書於朝士聲名大振仕至尚藥奉

北夢瑣言廊州馬醫趙鄂新到京都於通
衢自榜姓名云攻醫術有一朝士詣之鄂
言疾危只有一法請官人剩喫消梨不限
多少咀齧不及揅漿汁而飲到家旬日唯
喫消梨頓覺爽朗其恙不作遂召趙生資
以僕馬錢帛廣爲延譽官至太僕卿

彥伯列竈 玄亮修堂

國史補王彥伯自言醫道將行列三四竈
煮藥於庭老幼塞門而請彥伯指曰熱者
飲此寒者飲此風者氣者飲此各飲而去
翌日各負錢米酬無不効者

朝野僉載久視年中襄州人楊玄亮年二
十餘於虔州汶山觀傭力晝夢見天尊云
我堂舍破壞汝爲我修造遣汝能醫一切
痛悟而悅之試療無不愈者瀨縣里正背

有腫大如拳亮以刀割之數日平復療病
日獲十千造天尊堂成療病漸漸無効

陳寨換心 万福見頂

稽神錄陳寨者泉州晉江巫也善禁祝之
術爲人治疾多愈有漳州逆旅蘇猛其子
病狂人莫能療乃往請陳陳曰此疾入心矣
乃立壇於堂中至夜乃取蘇氏子臂爲兩
片懸堂之東壁其心懸北簷下寨方在
堂中作法所懸之心遂爲大食寨求之不

得驚懼乃持刀出門而去謂其作法耳食
頃乃持心而入內於病者之腹被髮連叱
其腹遂合蘇氏子既寤連呼近鋪近鋪家
人莫之測乃其日去家數里有驛吏手持
官文書死於道傍初南中驛路二十里置
一近鋪輒遣呼以敬言之乃寨取驛吏之心
而活蘇氏蘇遂愈如故

國史補柳芳爲郎中子登疾重時名醫張
万福初除泗州與芳故舊芳賀之具言子

病惟恃故人一顧也張詰曰候芳芳遽引
視登遙見頂曰有此頂骨何憂也因評
脉五六息復曰不錯壽且踰八十乃留方
數十字謂登曰不服此亦得後登爲庶子
年至九十

褚該盡術 德濟好命

北史褚該字孝通河南陽翟人幼而謹厚
尤善醫術仕梁歷武陵王府參軍該性淹
和不自矜尚但有請之者皆爲盡其藝術

時論稱其長者

名醫錄醫士沈道恭時會史令公族有患者約賜錢三千緡有人薦道恭醫之道恭訴薦者曰醫不憚固命薄恐爲厚賂之所障更欲募何人治之薦者曰唯周德濟也道恭曰聞德濟好命幸同召之道恭與診處令德濟用藥後果如効

詳見上道恭三千

吳善醫方 張達藥性

梁七錄吳普廣陵人爲華佗弟子少以藝

術知名善醫方則好嘗問道於華佗

唐書張文仲洛陽人以醫術知名則天時
爲侍御尤善療風疾其後則天令文仲集
當時名醫共撰療風疾氣方仍詔令麟臺
監王方愛監其修撰文仲奏曰風有一百
二十種氣有八十種大抵雖同人性各異
庸醫不達藥性之行使冬夏失節因此殺
人唯上氣頭風則隨發動臨時消息但有
風氣之人春末夏初及秋暮得通洩即不

致困劇

謚受母言 殷醫父病

晉書皇甫謚字士安幼名靜安定朝那人
漢太尉嵩之曾孫也年二十不好學遊蕩
無度嘗得瓜果輒進所後叔母任氏任氏
曰汝今年餘二十目不存教心不入道無
以慰我後得風痺疾因而學醫習覽經方
手不輟卷

晉書殷仲堪陳郡人也父病積年仲堪衣

不解帶躬學醫術究其精妙執藥揮淚遂
眇一目

太丞半夏 翰林橘皮

名醫錄劉太丞毗陵人有隣家朱三年三
十一歲忽然卒死脉全無請太丞治之取
齊州半夏細末一大豆許臨鼻中良久身
微溫暖氣復甦迤邐無事人問太丞單
方用半夏如何活得死人太丞曰此南岳
魏夫人方亦出外臺秘要

名醫錄李翰林天台人有相識莫生患喘
病久治不効因見翰林求治翰林與診脉
中汝此病日久矣我與治之廼取青橘皮
一片展開入剛子一箇將麻線縛定火上
燒煙盡留性爲末生薑汁酒一大呷服之
過口便定實神方也

任度蛇液 蔡謨蟛蜞

名醫錄隋有患者嘗飢而吞食則下至腎
便即吐出醫此是噎疾膈氣翻胃三候治

之略無應驗後有老醫任度視之曰非此
三候疾蓋因食蛇肉不消而致斯病但揣
心腹上有蛇形也病者曰素有大風疾常
求蛇肉食治風稍愈復患此疾矣遂以芒
硝大黃合而治之微泄利得愈醫者記其
驗而知蛇瘕也後有患者疾證無詢之乃
未嘗食蛇肉醫老疑之細察病情皆蛇瘕
之證以前藥療之又得安差後巢元方偏
次病源遂以意度之斯必飲食之中有蛇

液食而入腹成病也

徐廣晉紀蔡謨字道甫不知何許人素以儒學自達治莅知名性有道風耽尚醫術常覽本草經方手不釋卷及受揚州刺史將之任渡江食蟹誤中蟛蜞毒殆死歎曰讀爾雅不熟爲勸學所誤也

董奉起死 梁革活屍

神仙傳董奉字君異時杜燮爲交州刺史得毒病死三日奉時在南方往以三圓藥

內口中食頃燮開目動手足顏色還故
半日能起遂活人問其故曰初見赤衣吏
追去董真君有命遂得回耳

續玄恠錄梁革得扁和之術大和初爲宛
陵巡官按察使于敖有青衣曰蓮子一旦
以笑語獲罪斥出貨焉從事崔某者聞而
召焉請革評其脉革訖其臂曰二十春無
疾之人也崔喜留之送其直於敖崔寵之
未一年蓮子暴死革方有外郵之事廻及

城門逢柩車問其所葬曰蓮子也呼載歸而奔告崔曰蓮子非死蓋尸蹶也向者革入郭遇其柩載歸而往請蘇之崔怒革之初言悲蓮子之遽天勃然曰謂二十春無疾者一年而死今旣葬矣何以相見革曰苟不能生之是革術不神於天下乃令破棺出之遂刺其心及臍下各數處鑿去一齒以藥一刀圭於口中衣以單衣臥空床上以練索縛其手足有微火於床下曰此

火衰蓮子生矣以葱粥灌之遂活矣崔大
釋其怒

明生神救 涓子鬼遺

神仙傳馬明生者臨淄人也本姓和字君
賢少爲縣吏捕賊爲賊所傷當時暫死忽
遇神人以藥救之便活明生無以報之遂
棄職隨師初但欲治金瘡方後知有長生
之道乃久隨之五百餘年白日昇天而去
襲慶宣鬼遺方序劉涓子晉末於丹陽

郊外忽見一物高二丈許射而中之如雷
電聲如風雨其夜不敢前追詰旦率門徒
子弟數人尋蹤至山下見一小兒提罐問
何往曰我主被劉涓子所射取水洗瘡因
問小兒主人是誰云黃父鬼仍將小兒相
隨至門聞搗藥之聲比及遙見三人一人
開書一人搗藥一人臥尔乃齊唱叫突三
人竝走遺一卷癰疽方并藥一曰時從宋
武北征有彼瘡者以藥塗之即愈論者云

聖人所作天必助之以此天授武王也於是用方爲治千無一失號爲鬼遺方

從善銚源 賈祐纂要

名醫錄龐從善者年未四十亦醫之妙選也學業該博撰脉法銚源論一部共二十篇

名醫錄江夏賈祐世之名醫也慶曆中撰傷寒纂要三卷行世又撰人神論一卷訖脉須知三卷乃前賢未著之妙者矣

歡置孝經 張讀本草

吳均齊春秋顧歡字玄平吳都人也有病
邪者造之歡問君家有書乎荅曰唯有孝
經三篇歡曰取置病人枕邊恭敬之當自
差如言果愈後問其故歡曰善穰惡正
勝邪故尔

朝野僉載洛州有士人患應病語即喉中
應之以問善醫張文仲張經夜思之乃得
一法即取本草令讀之皆應至其所畏者

即不言文仲乃錄取藥合和爲丸服之應時而止一云問醫蘇澄云

巫彭初醫李密盡妙

說文巫彭初作醫

名醫大傳刺史李密慷慨有志節母患積年不愈乃習經方遂盡其妙多所全護由是亦以醫術知名焉

羊欣精能嗣伯多効

宋書羊欣字敬元志好文儒性耽方藥泣

事詳審診療精能以救療工奇累迁中散大夫義興太守撰方三十卷爲當代之所重焉

宋書徐嗣伯東陽人文伯弟志節慷慨超然不羣少負其才素好經方診決占候靡不詳練悉心拯救不限貴賤皆磨踵救之多獲其効特爲當代所稱也

呂博玉匱 孟詵金盤

玉匱針經序吳呂博少以醫術知名善訖

脉論病多所著述吳赤烏六年爲太醫令
撰玉匱針經及入註十一難經大行於世至
今傳焉

唐書孟詵汝州梁人也以進士擢第垂拱
初累遷鳳閣舍人詵學方術常於鳳閣
侍郎劉禕之家見其勅賜金盤謂禕之曰此
藥金也若燒之上有五色試之果然則天
聞之不悅因事出爲台州司馬撰補養方
必効方各三卷

雷公炮炙 文子散丸

本草有雷公炮炙論序又有炮熬炙炙方上中下三卷皆述制藥也雷公者黃帝時臣善醫術

列仙傳崔文子秦時太山人志好黃老事居潛山下後作黃散末藥賣之都市後有疫氣人死万計長吏請文子救之文子擁朱幡黃散以巡人間飲服圓散即愈所治活者以万計其後去之蜀賣藥故世人云

崔文子赤丸黃散近於神也

抱一仙豆 黃帝神丹

高道傳趙抱一年十二因牧牛遇一老人
問曰子飢否先生但點頭而已老人探手
囊中取食與之其狀如蘿蔔而味甘又與
拄杖一條瓢子一枚中有藥乃豌豆也諭
之令人服食於是沉痾新疾服之無不愈
又數童行時疫先生自瓢中取豌豆以新
水令嚥之即時汗如新沐人經夕皆愈後

請藥者如市

太清黃帝九鼎丹經軒轅黃帝陟王屋山
玉闕之下清齋三月乃登於玉闕之上入
瓊琳臺於金机之上得玄女九鼎神丹飛
雪爐火之道九鼎神丹成有黃龍下迎黃
帝上昇

壺公貨市 子信隱山

丹臺新錄謝元一號壺公即孔子三千弟
子之數也常懸一空壺市肆貨藥日入之

後公輒蹴入壺中舉世無人見者唯費長房於樓上見之往拜焉以師事之

北齊書張子信少以醫術知名恒隱白鹿山時出遊京邑甚爲魏收崔季舒所重太寧中徵爲尚藥典御又以太中大夫徵之歲餘謝病歸

道士醫工 書生療僂

稽神錄廣陵有木工因病手足皆拳縮不能復執斤斧扶踊行乞至后土廟前遇一

道士呼問其疾因與藥數丸曰餌此當愈
旦日平明復會於此木工辭曰某不能行
家去此遠明日雖晚尚未能至也道士曰
爾無憂但早至此遂別去木工歸餌其藥
手足甚輕趨走如故即馳詣后土廟前乃
見道士拜謝道士曰吾授爾方可救人疾
苦無爲木工耳遂再拜受之因問其名居
曰吾在紫極宮有事可訪遂去木工得
方用以治疾無不愈者至紫極宮訪之竟

不復見

稽神錄吉州刺史張曜卿有僸力曰陶俊嘗從軍征江西爲飛石所中因有腰足之疾因至白沙市避雨于酒肆同立者甚衆有二書生顧俊言曰此人好心宜爲療其疾即呼俊與藥二丸曰服此即愈乃去俊歸舟吞之良久疾差操篙理纜尤覺輕捷二書生竟不復見

張華優博 祖珽詳練

晉書張華字茂先范陽方城人也少孤貧
自牧羊同郡盧欽見而噐之劉放亦奇其
才以女妻焉華學業優博辭藻溫麗朗贍
多通圖緯方伎之書莫不詳覽

齊書祖珽強敏有機辨博學善屬文尤工
音律通四夷語盡陰陽星曆卜相占候醫
藥舟車噐械衣服飲食無不詳練

李譔該覽樓護精辯

蜀志李譔字欽仲梓潼涪人也父仁字德

賢與同縣尹默俱游荊州從司馬徽宋忠等學譔具傳其業又從默講論義理五經諸子無不該覽加博好技藝算術卜數醫藥弓弩機械之巧皆致思焉

前漢書樓護字君卿齊人父世醫也護少隨父爲醫長安出入貴戚家護誦醫經本草方術數十万言長者咸愛重之精辯論議常依名節聽之者皆竦

程高不倦 法存無厭

後漢書程高廣漢人性好經方問道不倦
有一藝長於己者必千里服膺聞涪翁善
醫術及著針經并脉法尋求積年竟乃得
之遂擅名當代爲太醫丞焉

千金序沙門支法存者嶺表僧也幼慕空
門希至道而性耽方藥尋覓無厭當代
知其盛名

巫咸鴻術 帛公素書

世本巫咸堯臣也以鴻術爲帝堯之醫

神仙傳千君者因病癩數十年百藥不能
愈忽見市中賣藥公姓帛因往問之公曰
可救以素書二卷授之曰不但愈病而已
當得長年千君再拜授之千君思得其意
內以治身修性外以消災救疾無不愈者
道成仙去

桐君藥對 甄權經圖

本草藥經序論桐公者黃帝臣也撰藥對
四卷及採藥錄說其花葉形色論其君臣

佐使相須至今傳焉

唐書甄權許州扶溝人以母病與弟立言
究習方書遂爲高醫仕隋爲祕書省正字
稱疾免魯州刺史庫狄欽風痺不得挽弓
權使彀矢嚮朔立鍼其肩隅一進曰可以
射矣果如言貞觀中權已百歲太宗幸其
舍視飲食訪逮其術擢朝散大夫賜几杖
衣服尋卒年一百三歲所撰脉經針方明
堂等圖傳于時

韓康長安萬祐成都

後漢書韓康字伯休一名恬休京兆霸陵
人家世著姓常采藥名山賣於長安市口
不二價三十餘年時有女子從康買藥康
守價不移女子怒曰公是韓伯休那乃不
二價乎康歎曰我本欲避名今小女子皆
知有我焉何用藥爲乃遯入霸陵山中
太平廣記黃萬祐修道於黔南無人之境
累世常在每三二十年一出成都賣藥言

人災福無不神驗蜀王建迎入宮盡禮事
之問其服食皆祕而不言曰吾非神仙亦
非服餌之士但虛心養氣仁其行妙其過
而已

村嫗禁毒異人治疽

玉堂閑話王蜀將田承肇常領軍戍于鳳
翔因引騎潛出解鞍憩于林木之下面前
忽見方圓數尺靜地中有小樹子一莖高
數尺並無柯葉挺然而立尤甚光滑肇就

之翫弄以手上下摩挲頃刻間手指如中
毒藥苦不禁於是鞭馬歸營迨至臂膊已
麤於桶時有村嫗善禁居在深山中急使
人召得已將不救嫗曰此是胎生七寸蛇
戲處噴毒在樹木間捫著樹枝立合致卒
肇曰是也急使人就彼斫之果獲二蛇子
長六七寸斃之嫗遂禁勒自脾間趲漸漸
下至于腕又併趲入食指盡食指一節趲
之不出蹙成一毬子許肉丸遂以利刀斷

此一節所患方除其斷下一節巨如一氣
毬也

夷堅志歙縣丞胡權遇異人都下授以治
癰疽內托散方曰吾此藥能令未成者速
散已成者速潰敗膿自出無用手擠惡肉
自去不假刀砭服之之後痛苦頓減其法
用人參當歸黃芪各三兩芎藭防風厚朴
桔梗白芷甘草各半之皆細末爲粉別入
桂末一兩令勻每以三五錢投熱酒服之

以多爲妙不能飲者煎木香湯代之然要不若酒力之奇妙有苦背瘍腫毒發効驗甚多真神仙濟世之寶也

高俞論脉

矯盧議疾

名醫大傳伯高少俞並黃帝時臣也未詳其姓輔佐黃帝詳論脉經對揚問難究盡義理以爲經論故到于今賴之

列子楊朱之友季梁得疾七日大漸其子請三醫一曰矯氏二曰俞氏三曰盧氏使

診其疾矯氏謂季梁曰汝寒溫不節虛實失度病由飢飽色慾精虛所致非天非鬼唯漸可攻也季梁曰衆醫也亟屏之俞氏曰汝始則胎氣不足乳湮有餘病非一朝一夕之故其所由來者漸矣弗可已也季梁曰良醫也且食之盧氏曰汝病不由人鬼及天也稟生受形既有制之者亦有知之者矣藥石其如汝何季梁曰神醫也重貺遣之俄而季梁病自瘳

守真治瘡 陳遂愈癰

名醫錄有富家子唐靖年十八九未娶忽於陰頭上生瘡怕疼不敢洗刮日久攻入皮肉連莖爛醫者止用膏藥貼之越疼有貧道人周守真曰此謂下疳瘡亦名妬精瘡緣爲後生未娶精氣溢盛陽道興起及當泄不泄不泄強泄日久遂爛有害却命者靖告先生爲治之守真曰若欲治此疾須是斷房事數日先用荊芥黃皮馬鞭草

甘草剉入葱煎湯洗之去膿。以訶子燒灰入麝香乾糝患處令睡。睡醒服冷水三兩口。勿令陽道興起。脹斷瘡。壓壓堅。即較也。

名醫錄何伯通池州銅陵人有女數歲項生癰子三十箇名醫治之不差有草澤醫人陳遂云此小娘子定是多要喫隔宿物夜間老鼠見食物蓋推搗不起乃浴碗器走思此食物淚落碗器中若人食之害癰

癰或曰久病漏損人須斑猫等醫治之即愈可鼠懼猫也

思邈千金 靳邵五石

唐書孫思邈京兆華原人也七歲就學日誦千餘言弱冠善談莊老及百家之說周宣帝時思邈以王室多故乃隱居太白山隋文帝輔政徵爲國子博士稱疾不起嘗謂所親曰過五十年當有聖人出吾方助之以濟人及太宗即位召詣京師授以爵

位固辭不受思邈自云開皇辛酉歲生詢之鄉里咸云數百歲人撰千金方三十卷行於代

晉書靳邵不知何許人性明敏有才術本草經方誦覽通究裁方治療意出衆表創制五石散方晉朝士大夫無不服餌皆獲異効

立言出蛇 法靖辨蛭

唐書甄立言仕爲太常丞有道人心腹懣

煩彌二歲診曰腹有蟲誤食髮而然令飲雄黃一劑少選吐一蛇如拇無目燒之有髮氣乃愈

名醫錄草蛭在山草上人行著脛股不覺於肉中育產亦大爲害馬蛭大長尺能啞牛馬人血水蛭居水中小者用之大効蜀本又有石蛭泥蛭並頭尖腰分鹿色赤不入藥誤食之則令人腹中生凡有子者去之此物難死雖加炎炎亦如魚子煙熏三

年得水猶活日華子云畏石灰破癥結然
極難修制須細剉後用微火炒令色黃乃
熟不尔入腹生子爲害又興國中有婦人
患血癥令水蛭藥治之血癥得愈而或日
發心腹疼痛面青倒仆不省人事醫不能
識後會川僧法靖詢其由謂蛭子復生兒
聚嚙臟腑耳制之用石灰槓擲服之方愈
矣蛭已死而制子不盡入腹中既能爲害
昔楚王食芹所得而吞之一無所損者先

儒謂聖俗有異陰陽不同者也

歷代名醫蒙求卷之上